

Aligkhujon ay Pfukhan.

1 Anu cha Aligkhujon ay Pfukhan an gwa han chugwa an empfalay cha an cha Khullunan ay Khajon.

2 Ja khun cha i pun-achukhan hichi pajaw ti cho-or ken chin pajaw cha.

3 Ja hi ayya Khullunan ja inali cha hi, <<Umuy a ta he-a chi i mun-achug hichi nanginnahpfun an pajaw ta-o ta hi Khajon ja hija chi khun mun-achug heto nanginna'jab an pajaw ta-o. Ja oto'togna hon nalo' aju ay ni pfalay ta-o ta un mi khun ijali hay anun ju.>>

4 Ja amat hichi anu atag ken ja inalin cha Khullunan ay Khajon hi, <<Ti aa ken, ta i mi achukhon hini pajaw ta-o ta achi pun-a-an chi hagwiti.>>

5 Amat hichi ja gwa an nanong ja enala cha anu atag chin loblopfong cha ja chin ur-ulloh cha ja nunhijan cha an hin-akhi.

6 Ja immuy hi Khullunan ay chuy nanginnahpfun an pajaw cha ja immuy khu ken hi Khajon ay chuy nanginna'jab.

7 Ja immuy cha ja ente-a cha anu an mun-achug hi nanong ja ingkhana hi mahilip.

8 Ja inalin Aligkhujon ay ahagwa na an hi Pfukhan hi, <<He-a akkay chi i khun mang-uy ay ni anun hay hana ung-ungungnga hichi pajaw ti tan ha-in ja ija' khun me'pfo'la. Hotti nangamong a an munhakha'-ang ja mang-uy hi hongot cha.>>

9 Ja amat hichi anu ja allon Pfukhan hi, <<Ti aa kayakhu.>>

10 Ja khun umu-umuy chi arkhaw ja hi Pfukhan ja gwahna han tinnig na an oha an engha na.

11 Ja hini engha na ayya ja chalan hini pfalay cha an hijay khun agwun Pfukhan an mang-uy hi hongot chin ung-ungungnga.

12 Ja unagkhu anu en a ja hi Aligkhujon ja gwa ayya anu atag hay pfo'pfo'laona hon impi-uy na ay Pfukhan an allona hi, <<Inginam hitay hay manmannu' ta gway ipihcham ay ni ung-ungungnga an i khun mun-achug.>>

13 Hon khun alan Pfukhan hichin pfino'lan Aligkhujon hon ingngina na hi manu' ja hay inahinan ta ipihcha na chin ung-ungungnga.

14 Muti unagkhu anu atag khun umu-umuy chi arkhaw ja khuna eto'nan hi Khullunan hi pe'-ana ja hi ayya Khajon an hi ibpfan Khullunan ja mapmaphod chin khun ijuy ina na an anuna ja ihcha na.

15 Ja hi ayya anu atag Khullunan ja hay tugtugkhud ja hay tungar chi manu' chi khuna ijuy hi khun pe'-ana.

16 Ti najuna gwot ja hichin khuna pang-ajan chin mun-aphod an anun ja chin engha na.

17 Ja amat hichi ja khun atag ma-ong-ong-ong hi Khullunan ja hi ayya Khajon ja matatabpfa ti mun-aphod chin khuna anun.

18 Ja khemhona atag hu-un maphod khu chin khun pe'-an ibpfa na an hi Khullunan.

19 Ja amat hichi ja hi Khullunan ja mattomattoy hi henaang na muti un anu umuy hi ina na hon achi anu tikhan hi Khullunan an una anu ipfughor chin pantaw hon inali na hi, <<Tayya han pe'-an mu khu, Khullunan!>>

20 Muti un anu emohgwat Khullunan hon napfupfuhgwit chin tungar ja chin tukhud an anuna.

21 Ja amat hichi ja gwa han hennomananong ja inanuhan anu atag Khullunan ja khimmahad.

22 Ja nunnomnom hija.

23 Ja allona hi, <<Nga chah ton ato' atag? Ti tan matoja' hi henaang u ja achi umali hi ama an mannig ay ha-in.>>

24 Ja amat hichi ja unagkhu anu naloh han pfukha ja allon anu Khullunan hi, <<Pfukhapfukha, og-okhahhom hay oha ay ni payyapayya' mu ta gway pe'payyapayya' u an me'tayyatayyap ad lagkhulagkhud.>>

25 Ja amat hichi anu ja enpajagpag anu chin pfukha chin oha an chutchut na.

26 Ja immuy anu hi Khullunan ja enala na ja inchu'-ot na ay chin ipfat cha.

27 Ja gwa khu an nungkhawkhagwa ja naloh han pfalog ja inali na khu hi, <<Pfalopfalog, og-okhahhom adni' hay aha ay ni payyapayya' mu ta gway pe'payyapayya' u an me'tayyatayyap ad lagkhulagkhud.>>

28 Amat hichi ja enpajagpag khu chin pfalog chin oha an chutchut na ja i khu anu atag enalan Khullunan ja inamong na.

29 Ja unagkhu gwa an naha'-ad ja chengngor anu Khajon hichin khun pun-uwai' an Khullunan.

30 Ja allona anu hi, <<Anagkha atag ta khun mun-u-uwai' hi ibpfa' an hi Khullunan? Unchani atag ja un immingoho hotti ta umuja' ta ija' tikhan.>>

31 Muti unagkhu allona ta umuy ja chenom-or chin hagwiti an omman chin pakhuy ja agkhuy na atag intuloy an umuy ti cho-or chin hagwiti ja khun cha pon-a-an chin achukhana.

32 Amat hichi ja gwa khu han hennomananong ja khimmahad khu hi Khullunan ja tinnig na khu han muntayyatayyap an khajang.

33 Ja allona khu hi, <<Khajakhajang, og-okhahhom hay oha ay ni payyapayya' mu ta gway pe'payyapayya' u an me'tayyatayyap ad lagkhulagkhud.>>

34 Ja amat hichi ja empajagpag anu chin khajang ja nun-a'-akhah chin chutchut na.

35 Ja immuy anu atag hi Khullunan ja madmachennor an mun-omong ti cho-or chin chutchut an engkhah chin khajang.

36 Ja amat hichi anu ja inhikhop Khullunan ja khuna anu epacha ja khuna allon hi, <<Aa, tojan ammuna hi pe'chutchut u muti mahapor an gway hopfat ja gway khamat u.>>

37 Ja amat hichi anu khu ja pfimmutay khu ay chin partug ja tinnig na khu han pugwapo.

38 Ja inali na khu hi, <<Pugwapugwapo, og-okhahhom hay oha ay ni hopfat mu ta gway pe'hopfat u an me'-ali ad lagkhulagkhud.>>

39 Amat hichi anu ja ingwitigwit chin pugwapo hichin ulu na ja nakhah chin hopfat na.

40 Amat hichi ja aygwikhit hi Khullunan an i mangala ja tinnig na anu hi ina na an gwa an khun umali an nuntutunnud cha chin engha na.

41 Ja khun cha makmakekke.

42 Ja khinalakhar anu atag Khullunan ja enha'pfa na chin hopfat ja chin chutchut an inamong na.

43 Ja allon Khullunan hi, <<Aa, hichuy chi enghan ina an khuna pangeto'to'nan ay ha-in.>>

44 Ja amat hichi anu ja emmatam cha Pfukhan chin engha na chin agwachaan Khullunan ja khun cha anu kekejan an allon Pfukhan hi, <<Anagkha, Khullunan, ta malili-oh a ay ni patjay ja achi a pfumutay ta mun-achug a.>>

45 Amat hichi anu ja allon Khullunan hi, <<Aa, toja' an pfumutaja'.>>

46 Ja enggwallang anu ken ina na hichin pe'-an Khullunan an tukhud ja tungar.

47 Ja empacheh cha chin engha na.

48 Ja pfimmangon khu atag hi Khullunan ja emmohchong na chin in-alin ina na an tukhud ja tungar an anuna.

49 Ja khun anu mun-a-akhah chin luwa na an allona hi, <<Anagkha atag tatagwa ta amat heto hi ina an khuna' eto'to'nan?>>
50 Amat hichi ja pfimmutay khu ken anu ja tinnig na han alaw an maloh.
51 Ja inali na khu hi, <<Ala-alaw, og-okhahhom hay khamat mu ta gway pe'khamat u an mi'jali ad lagkhulagkud.>>
52 Ja nun-epajagpag anu chin alaw hichin hu-i na ja nakhah chin chugwa an khamat na.
53 Amat hichi ja allon anu Khullunan hi, <<Aa, toja atag an ammuna hitay hi pe'tajap u ta me'-uja' akkay ad lagkhulagkhud.>>
54 Amat hichi anu ja allona hi, <<Ai', mahapor ay chita angnge an umuja' ta ija' pfokhaan hi ibpfa' an hi Khajon tatagwa ja una' me'tajap.>>
55 Amat hichi anu ja immuy ay chin agwacha an Khajon ja khun anu mun-ugwap an allona hi, <<Chaad a mah, ibpfa' Khajon? Tan umaliya' akkay an me'lewlegwa ti tan immingohowa'.>>
56 Ja mun-an-anla anu atag hi Khajon an allona hi, <<Aa, umali a atag ti tan immingohowa' ay he-a an napfajag ja agkhuy ta nuntinnikhaw.>>
57 Ja immuy anu hi Khullunan ja unagkhu anu tinnig Khajon hi ibpfa na ja na'na'-ong-ong!
58 Ja allon Khajon hi, <<Anagkha ta na-ong-ong a? Un a chah nunchokhoh?>>
59 Ja allon Khullunan hi, <<Aa.>>
60 Ti achi na podhon an ipa-innila ay hija an untugtugkhud ja tungar chi khun ichat ina cha ay hija.
61 Ja amat hichi anu ja allon Khajon hi, <<Ay inay, atag, an un a nunchokhoh ja agkhuy u inila.>>
62 Ja allon Khullunan hi, <<Aa, muti tan temmenong.>>
63 Ja unot anu atag na'na'-amtang ja gwa an homelong ja khun anu allon Khullunan ay ibpfa na an hi Khajon hi, <<Hot tan umuja' hotti un atag ken nangamong hi pigwana.>>
64 Ja khun anu atag mun-a-akhah chin luwa na.
65 Ja allon Khajon hi, <<Aa, muti achi a atag kumila ti umaliya' hi magwi'gwiit ta ijali' hay aggan ni anu' ti unchani ja un ad-adchi hay khun mu pe'-an.>>
66 Ja allon Khullunan hi, <<Aa, ammuna atag.>>
67 Amat hichi ja immanamot hi Khullunan ja ente-a na gwot an epacha chin chutchut na.
68 Ja gwa anu an temmonga ja nachutchutan hija ja allona hi, <<Nga chah ton ato' an mangho'-op ay tay hopfat u?>>
69 Amat hichi anu ja oto'togna anu ja enho'-op na anu chin ta-o na.
70 Ja ammu-ammuna anu.
71 Ja allona hi, <<Nga chah ni agkhuy pay?>>
72 Ja inudhungana anu chin chapana ja allona hi, <<Ma-id kha'-omot u ay chita angnge!>>
73 Amat hichi ja enala na chin kha'-omot ja empacha na ay chin hu-i na ja ammu-ammuna anu.
74 Ja immuy hichi cholah ja khuna anu epadpacha an tomajap.
75 Ja unagkhu a'-alina anu ja mompfopfob chin ahagwihagwiti an umali.
76 Ja allon cha ay Khullunan hi, <<Umali a akkay ni' ta tomajap ta-o ta i ta-o mannig hi anun ti cho-or makay hini anun hichi pfuludna an achi amat ay inam an khun chi-a atag eto'to'nan.>>
77 Amat hichi anu ken ja ne'tajap hi Khullunan.
78 Ja in-uy chin ahagwihagwiti hichi acho'lan chi pfunga.
79 Ja allon cha hi, <<Tayya! Pun-a-an ta-o hay hato ta gway atom an me'tapfa ti niyya atag an na-ong-ong a.>>

80 Ja unot achi mapfajag chi arkhaw ja himmapfit hi Khullunan.
81 Unagkhu anu en a ja hi ken ina na an hi Pfukhan ja allona hi, <<Ijam tatagwa ta ijuy u hay mapmaphod hi pe'-an Khullunan ti un akkay tatagwa nunnaud an na-ong-ong ja tan umanamot hi Aligkhujon hi magwi'gwiit ja una' chah achi patajon una tikhan hi Khullunan an na-o-ong-ong.>>
82 Ja immuy anu hi Pfukhan ay chuy khun pun-achukhan Khullunan.
83 Ja unagkhu anu immuy ja allona hi, <<Chaad a mah, Khullunan? Tan in-ali' han anum an maphod.>>
84 Ja ma-id anu tompfar.
85 Ja amat hichi anu ja henongkhop hi Pfukhan ja tinnig na ja chutchuchutchut chin cholong.
86 Ja allona hi, <<Chaamah khu ay chita angnge hi Khullunan? Nga chah ton i na immajan?>>
87 Ja nun-ugwap anu ay Khajon an allona hi, <<Ngay i immajan Khullunan? Anagkha ti tan ma-id?>>
88 Ja allon Khajon hi, <<Tawwan. Ti un gwa han hen-oma-arkhaw an immali heto ja na'na'-ong-ong an allona un nunchokhoh.>>
89 Ja amat hichi anu ja empacheh Pfukhan an i maningit ja nepallog anu hi Khajon ay chin achaaan Khullunan.
90 Ja unagkhu anu atag tinnig na hichin topfong ja napnu hi tukhud ja tungar chi pfapfuy ja manu'.
91 Ja allon anu Khajon hi, <<Aa, an un atag hayhato tugtugkhud hini khun ijalin ina an pe'-an Khullunan an hi ibpfa'. Hijaot un ma-ong-ong.>>
92 Ja immali gwot anu hi Aligkhujon an hi ama na.
93 Ja empfaag ken Khajon an allona hi, <<Un ento'to'nan ina hi Khullunan ja hini engha nay hinalimunana. Ja tayya ken an i ne'tajap hi Khullunan.>>
94 Ja amat hichi anu ja achi khun pang-anun Aligkhujon hi Pfukhan an una ipfupfukok hichi pfalay.
95 Ja nunnaud hija an na-ong-ong khu.
96 Ja khun i hingihingiton Aligkhujon hi Khullunan.
97 Ja ma-id ina chakngan.
98 Ja allona ay Pfukhan hi, <<Achi' panganun he-a ingkhana an chaknga' hi Khullunan.>>
99 Ja gwa anu han ohan nadhom an temmonga ja inalin anu Khullunan chin numpun-ibpfa na an hagwiti hi, <<Ijuy ta-o mah hitay khigwi hichi pfalay mi ta pe'-an cha ama.>>
100 Ja allon cha anu hi, <<Aa.>>
101 Ja gwa anu ken an malengkhop cha ama na an nanallo' ja in-uy cha anu.
102 Ja inur-ulloy anu Khullunan ja impfughor na ja enggwallang na chin khigwi ja empacheh cha.
103 Ja allon anu Khullunan hi, <<Un adni' pe'-an ina hon pfato hitay khigwi.>>
104 Ja unagkhu nagwi'gwiit ja pfimmangon cha ama na ja tinnig cha chin khigwi an negwagwallang chin pamachingan.
105 Ja khun cha anu anun.
106 Ja allon anu Pfukhan hi, <<Ijam adchiya ta pe'tamtam u.>>
107 Ja unagkhu anu pe'-an hon pfato!
108 Ja amat hichi ja allon anu Aligkhujon hi, <<Aa ken, ti hitay khigwi ja in-alin Khullunan an khun mu eto'to'nan. Hotti hijaot un amat hina.>>
109 Amat hichi ja nunnomnom anu hi Aligkhujon.
110 Ja allona hi, <<Nga chah ton ato' ta chupopo' hi Khullunan ta achi tatagwa mumpfalin hi hagwiti ja ingkhana?>>

111 Ja gwa anu han ohan nadhom ja allon Aligkhujon hi, <<Alam ja umali tatagwa ad ugwani khu hi Khullunan an mang-ali hi khigwi. Hotti ijam ta achiya' malo' ta ingkhana umali hija.>>

112 Ja timmu-ar anu hi Aligkhujon ja unagkhu temmonga ja mompfopfob chin ahagwihagwiti ja numpumpatto' cha chin ator.

113 Ja immuy khu anu hi Khullunan ja khuna ur-ullayon an ipfughor.

114 Ja gwa anu an impfughor na ja henongkhop ta egwallang na chin khigwi ay chuy patjay.

115 Ja khinalakhar ama na ja impfukhot na chin pantaw ja chimpap na hi Khullunan.

116 Ja ingkha-ot na chin pfakhat ni pfalay.

117 Ja khun anu mun-umun-ugwap hi Khullunan an allona hi, <<Achiya' numpay chupopon ay he-a, ama!>>

118 Ja pfimmangon anu hi Khajon ja allon anu Aligkhujon hi, <<Achi ay chita angnge mapfalin un la-ahna ja i a mumpfalin hi hagwiti.>>

119 Ja immuy anu ken hi Khajon ja khun cha pun-aan chin chutchut na.

120 Ja khun anu ken kumikumila hi Khullunan an allona hi, <<Achi ju adni' pun-aan hini chutchut u.>>

121 Muti khunot ken pun-aan cha Khajon ay ama na.

122 Ja nunloh-op na chin hopfat ja chin khamat ja allon Aligkhujon hi, <<Tayya. Numpfalin a hi takhu ja ngay khapu na ta i a mumpfalin hi hagwiti?>>

123 Ja empfaag na ken an amin chin ena-enat ina na an hi Pfukhan.

124 Ja inalin Aligkhujon ay Pfukhan hi, <<Tayya an un angkhay hi engham ja i numpfalin hitay unga hi hagwiti ti un mu ento'to'nan hija. Hotti ad agwani ja munhijan ta ta umuy a ay ni engham.>>

125 Ja khun anu atag kumila hi Pfukhan an achi na podhon an munhijan cha.

126 Muti teneynan chamchama Aligkhujon ja ma-id pohod na hi ni'tkahuwan Pfukhan.

127 Ja mapmaphod ken chin pi'takhuwan cha Khullunan ay Khajon.

128 Ja angkhay.